

MAITE NERIA-RI.

Galdetu nairik aingeru bati
 Zer zuben nitzaz pentsatu,
 Bere aurrian chit kupigarri
 Nitzayon belaunikatu;
 Biyotzez niyon bada esaten
 Arren ez itzik ukatu,
 Baldin gizon bat ez badezu nai
 Betiko lurpian sartu.

Gau eta egun, naiz lo, naiz esna,
 Nabillen leku guztiyan,
 Betiko amets ark ipintzen nau
 Gaiſotutzeko zoriyan;
 Dardaizo bat daukat jarriya
 Eskui aldeko begiyan,
 Eta sartua ezten zorrotz bat
 Nere biyotzan erdiyan.

Negar egin nai, bañan iñola
 Ez det malkorik iſurtzen,
 Nolaz bait ere zaill izango da
 Bear bezela samurtzen;
 Bada biyotza asiya daukat
 Kandelan antzera urtzen,
 Or asiko naiz udazkenian
 Enadan gisa agurtzen.

Aingeru orren begiyak dira
 Amets nereko izarrak,
 Ez du berdintzen orren illerik
 Kolorez arto bizarrak;
 ¿Nola botatzen ditu zipristin
 Suzkuak garo igarrak?
 Bada alaſe botatzen dizkit
 Begitik maita chingarrak.

Negar egiñaz aur baten gisa
 Galdetu niyon bildurrez;
 Ia benetan esango ziran
 Maite ninduben edo ez;
 Ikusirikan nola neguen
 Beragatikan negarrez,
 Eranzun ziran, jez negar egin,
 Ni zuria naiz biotzez!

JUAN IGNAZIO URANGA.